

# Cun il cudesch viva la brigada vinavant

## Brigada d'infanteria da muntogna 12

DA GION NUTEGN STGIER / ANR

■ **Cun l'act final da la brigada «grischuna» è er gist cumpari in cudesch che duai tegnair en regardanza quella truppa. Sin 140 paginas vegnan tranter auter a pled ils quatter cumandants e lura er autras persunas che han gi ina relaziun pli strètga cun la brigada.**

La Brigada d'infanteria da muntogna 12 è en sis emnas definitivamain istorgia. Per brigadier *Peter Baumgartner*, l'ultim cumandant, ina buna raschun d'edir cun anc auters auturs in cudesch che lascha viver la brigada anc per ditg. Il cudesch «Wo Flachländer auf Gebirgler trafen» cumpiglia l'istorgia da la Brigada d'infanteria da muntogna 12 ed è illustrà cun numerusas fotografias singularas. Ina buna part da l'ovra è deditgada a tut las quatter truppas surregionalas dal «12»

che l'armada svizra ha gi davos 80 onns.

### Bunas fotografias

Il cudesch è en vair senn ina ediziun da luxus stampà sin in palpiri bain legibel e cun ina scrittira leva. Las fotografias èn fitg autenticas, ellas èn fatgas d'uffiziers dals sis battagliaiuns da la brigada ed èn cunzunt er da qualitat fitg buna. Ellas dattan al cudesch ina retrospectiva figurativa da l'istorgia da la Brigada d'infanteria da muntogna e conferman er la gronda activitad d'uffiziers e schuldads da quella truppa che svanescha da l'armada svizra.

### A pled vegn er cusseglier federal Parmelin

Per l'introducziun dal cudesch segna cusseglier federal *Guy Parmelin*, il schef dal

departament da defensiun e sport. Tema central da sia contribuziun è la cuntinuitad, ella che saja l'effizienza per ina segirezza per il schurmetg da noss pajais e sia populaziun.

Da laschar svanir en vista al svilup da l'armada intginas truppas, cun ina tradiziun sco la Brigada d'infanteria da muntogna 12, saja bain collià cun melanconia e memoria, scriva Parmelin. En la politica da segirtad na saja la nostalgia dentant nagin factur da success, èsi da leger vinavant. Be l'effizienza e la prestaziun quintan per dumagnar las sfidas en la defensiun e segirezza, punctuescha il cusseglier federal en ses pled d'introducziun. Il svilup (WEA) da l'armada vegnia ad influenzar l'armada sezza, ses profil ed er il concept da scolaziun e furmaziun, scriva Parmelin. Quel svilup da l'armada saja la raschun principala che l'armada re-

nunzia en l'avegnir a singulas truppas da l'infanteria sco la Brigada d'infanteria da muntogna 12.

### Er la politica chantunala vegn a pled


Cun avair fatg part da la Brigada d'infanteria da muntogna 12 per gronda part uffiziers e schuldads dals chantuns Glaruna, Grischun, Son Gagl e Turitg na mancan en il cudesch da cumià da la brigada er betg las contribuziuns dals schefs dal departament da militar da quels chantuns. Cusseglier guvernativ *Christian Rathgeb*, el che ha sez fatg servetsch en il stab da la brigada grischuna, tematisescha cunzunt l'impurtanza da quella truppa or da vista da nossa societad e l'aspect social.

Il contact tar las autoritads politicas e tar la populaziun dals cumandants da la Brigada d'infanteria da muntogna 12 sajan stads da gronda valur e da gronda impurtanza, menziuna Rathgeb en sia contribuziun.

### Da manar quella brigada è in'onur

Lur impressiuns e lur bels muments cun la brigada scrivon en il cudesch er ils quatter cumandants. Quai è l'anteriur divisunari *Fritz Lier*, il cumandant da corp e nov vicecumandant da l'armada *Aldo C. Schellenberg*, il brigadier *Franz Nager* ed il brigadier *Peter Baumgartner*. Da star al timun d'ina truppa uschè motivada, plain vitalitad, cun in profil fitg agen e cun ina forza sco il pli custaiavel granit grischun saja stà in'onur, scrivon ils quatter cumandants.

A la fin dal cudesch survegn il lectur ina survista dals battagliaiuns da la Brigada d'infanteria da muntogna cun ils nums da lur cumandants. La gronda part dal cudesch è però deditgada a l'istorgia da las truppas dal «12». Per quella contribuziun d'otg paginas è colonel *David Accola* responsabel.



Per il cumià da la Brigada d'infanteria da muntogna 12 è cumpari in cudesch en memoria da la truppa grischuna.

FOTO G. N. STGIER